

摘藻堂四庫全書薈要

子部

欽定四庫全書薈要

子部

御製律呂正義後編卷一百



詳校官主事臣陳木

欽定四庫全書會要卷一萬一千三十六

子部

御製律呂正義後編卷一百

樂章考八 郊祀

宋四



宋祀大火樂章

案通考曰宋慶歷中修大火祠三月九日祠之位版以黑漆朱書曰大火位配位曰關伯位然是時未有樂章高宗紹興朝始載祀大火樂章宣明王即關伯居商丘主大火降神用高安升殿用正安熒惑位奠玉幣用嘉安商丘宣明王位奠幣用嘉安捧俎用豐安熒惑位酌獻用祐安宣明王位酌獻用祐安亞終獻用文安送神用理安凡十二章

降神用高安

圜鐘為宮

五緯相天各率其職司禮與視則維熒惑至陽之精屈
我長羸於以求之祀事孔明

黃鐘為角

有出有藏伏見靡常相我國家鑒觀四方視罔不正終
然允臧神其來格明德馨香

太簇為徵

小大率禮不愆于儀展采錯事秩祀孔時維今之故閱
我數度修厥典常神其來顧

姑洗為羽

於赫我宋以火德王永永不圖繫神之相神之來矣維
其時矣禮備樂奏神其知矣

升殿用正安

有儼其容有潔其衷屹屹崇壇伊神與通神肯降格嘉
神之休虔恭降登神乎安留

熒惑位奠玉幣用嘉安

馨香接神肸鬯恍惚求神以誠薦誠以物有藉斯玉有
筐斯幣是用薦陳昭茲精意

商丘宣明王位奠幣用嘉安

熒惑在天惟火與合繫神主火純一不雜作配熒惑祀
功則然不腆之幣予以告虔

捧俎用豐安

火遵其令無物不長視此牲牢務得其養恭以祀神有

膾其肥非神之宜其將曷歸

熒惑位酌獻用祐安

皇念有神介我戩穀登時休明有此美祿酌言獻之有
飮其香神兮燕娛醉此嘉觴

宣明王位酌獻用祐安

誰其祀神知神嗜好闕伯祀火為神所勞睠言配食既
與火俱於樂旨酒承神嘉虞

亞終獻用文安

神既貺施嗜我飲食申以累獻以承靈億神方常羊咸
畢我觴于再于三于誠之將

送神用理安

登降上下奠璧獻尊音送粥粥禮無違者已虞至旦神
其將歸顧我國家遺以繁釐

出火祀大辰樂章

案宋史樂志曰出火祀大辰降神用高安升殿用
正安大辰位奠玉幣用嘉安商丘宣明王奠幣用

嘉安捧俎用豐安大辰位酌獻用祐安宣明王位
酌獻用祐安亞終獻用文安送神用理安凡十有
二章

降神用高安

圜鐘為宮

曄曄我宋火德所畀用火紀時允惟象類神目類歆誠
繇類至有感斯通孚我陽燧

黃鐘為角

樂音上達粵惟出虛火性炎上亦生於無我鑪我磬我
笙我竽氣同聲應昭哉合符

太簇為徵

火在六氣獨處其兩感生維君繫神克相何以驗之占
茲垂象騰駕蒼蚪歛其來饗

姑洗為羽

星入於戌與火俱訕火出於辰與星俱伸一伸一訕孰
搖縱之利用出入民咸用之

升殿用正安

屹彼嘉壇赤伏始屆
掞光耀明洋乎如在
俛仰重離默與精會
隨我降升肅聽環珮

大辰位奠玉幣用嘉安

維莫之春五陽發舒日之夕矣三星在隅
莫量匪幣莫嘉匪玉
明薦孔時神光下矚

商丘宣明王奠幣用嘉安

二七儲神與天地並孰儷厥德聿惟南正
功樹陶唐澤

流億姓作配嚴裡贊列惟稱

捧俎用豐安

有嚴在滌陳彼牲牢孔碩其俎薦此血毛厥初生民飲
茹則然以燔以炙伊誰云先

大辰位酌獻用祐安

孰為大辰維北有斗曾是彗星斯名孔有幽崇報功潔
齊敢後容與嘉觴式歆旨酒

宣明王位酌獻用祐安

周設司燿雖列夏官仍襲孔易闡端實難相彼商丘永
懷初造不腆桂椒匪以為報

亞終獻用文安

潛之伏矣柞櫨既休有俶其來榆枹是求靈駕紛羽尚
其安留飲我三爵言言油油

送神用理安

五運惟火實宗衆陽宿壯用明千載愈光神保聿歸安
處火房鬱攸不作災圖永昌

納火祀大辰樂章

案宋史樂志曰納火祀大辰降神用高安升殿用
正安大辰位奠玉幣用嘉安商丘宣明王位奠幣
用嘉安捧俎用豐安大辰位酌獻用祐安宣明王
位酌獻用祐安亞終獻用文安送神用理安凡十
有二章

降神用高安

圜鐘為宮

赫赫皇圖炎炎火德侈神之賜奄有方國棗盛既豐俎
豆有飮於萬斯年報祀無斁

黃鐘為角

火星之躔有睽其光表于辰位伏于戌方時和歲稔仁
顯用藏告爾萬民出納有常

太簇為徵

季秋之月律中無射農事備收火功告畢克禋克祀有
嚴有翼風馬雲車尚其來格

姑洗為羽

明明我后重祭欽祠有司肅事式薦晨儀禮惟其稱物
惟其時神之聽之福祿來為

升殿用正安

猗與明壇右平左城冕服斯皇玉珮有節陟降惟寅匪
徐匪疾式崇大祀禮文咸秩

大辰位奠玉幣用嘉安

金行序晚玉露晨清齊戒豐潔肅恭神明嘉幣惟量嘉

玉惟精於以奠之庶幾來聽

商丘宣明王位奠幣用嘉安

恭惟火正自陶唐氏邑于商丘配食辰祀有功在民有德在位敢替典常惟恭奉幣

捧俎用豐安

萬彙攸成四方寧謐工祝致告普存民力迺薦斯牲為俎孔碩介以繁祉式和民則

大辰位酌獻用祐安

庶功備矣休德昭明天地釀和鬱鬯斯清玉瓚以酌瑤觴載盈周流常羊來燕來寧

宣明王位酌獻用祐安

廣大建祀式崇其配馨香在茲清酒既載穆穆有暉洋洋如在聿懷嘉慶繫神之賚

亞終獻用文安

幣玉肅陳笙簧具舉桂醕浮觴瓊羞溢俎禮有三獻式和且序神具醉止慶流寰宇

送神用理安

神靈降鑒天地回旋惟馨薦矣既醉歆焉諸宰斯徹式
禮莫愆隕祉降祥天子萬年

宋祭社稷樂章

案宋史樂志曰真宗景德祭社稷降神用靜安奠玉
幣酌獻用嘉安送神用靜安凡三章

降神用靜安

百穀蕃滋麗乎下土聿崇明祀垂之千古育物惟茂粒

民斯普報本攸宜國章咸覩

奠玉幣酌獻用嘉安

於穆大祀功利相宣靈壇美報歷代昭然介以蕃祉祚
以豐年土爰稼穡允協民天

送神用靜安

制幣犧齊正辭無愧樂以送之畢其精意

景祐祀社稷樂章

案宋史樂志曰仁宗景祐祀社稷迎神用靈安初

獻升降用正安太社后土太稷后稷奠玉幣並用
嘉安奉俎用豐安亞終獻用文安送神用寧安奉
俎用豐安凡三章按正安嘉安豐安辭並同前亞
終獻用文安亦有目無辭疑用別祀內樂章也
迎神用靈安

五祀之本百貨何極道著開闢惠周動植國崇美穀民
資力穡奠獻惟寅神靈來格

送神用寧安

神之來兮降茲下土神之去兮杳無處所壇壝肅然瘞幣徹俎乃粒之功冠千萬古

奉俎用豐安

神州地祇皇地祇與社稷通用

禮崇明禋惟馨斯酒潔粢豐盛殺時享牲齊莊嚴祇升燎于禋其報伊何如山如阜

大觀祀社稷樂章

案宋史樂志曰徽宗大觀祀社稷迎神用寧安初獻升降用正安奠幣用嘉安酌獻用嘉安亞終獻

用文安送神用寧安凡九章

迎神用寧安

黃鐘二奏

惟土之尊民食資焉陰祀昭格牲牢腥羶有功于民告
其吉蠲神之來享雲車翩翩

太簇角二奏

惟穀之神函育無窮百嘉蕃殖民依厥功嚴飭壇壝威
儀肅雍神之來享祈于登豐

姑洗徵二奏

猗歟那歟生養斯民家給人足時底熙純祗嚴明禋於薦苾芬粢盛豐潔神乃有聞

南呂羽二奏

籩豆斯陳三牲告幽報本之禮答神之休來歆芬香豐登于秋倉箱千萬治符成周

初獻升降用正安

崇崇廣壇嚴恭祀事威儀孔時周旋進止鏘若環珮誠

通于幽相于農植邦其咸休

奠幣用嘉安

於嘻陰祀封土惟崇于時之吉歆予鼓鐘柔靜化光人
賴其功陳茲量幣百貨是隆

酌獻用嘉安

坤元生物功利相宣蠲茲祀事美報致虔清酤芬如靈
壇巋然酌尊奠觴神其格焉

亞終獻用文安

薦嘉亶時洋洋來格載登茲壇齊明維敕神用居歆順
成農穡其崇若壙其比如櫛

送神用寧安

尊壘芬香威儀肅雍靈心嘉止洋洋交通神歸降禧年
斯屢豐倉箱千萬慰予三農

紹興祀太社太稷樂章

案宋史樂志曰高宗紹興祀太社太稷迎神用寧
安盥洗用正安升壇用正安太社位奠玉幣用嘉

安太稷位奠玉幣用嘉安還位用正安捧俎用豐
安太社位酌獻用嘉安太稷位酌獻用嘉安亞終
獻用文安徹豆用娛安送神用寧安望瘞用正安
凡十七章

迎神用寧安

函鐘為宮

春社用

五祀之本社稷有嚴芟柞伊始夫敢不虔吉日惟戊式
薦豆籩神其來格用介有年

函鐘為宮

秋社臘用

功烈在民誕受露雨良耜既歌乃揚帟舞是奉是尊厚
禮斯舉相其豐年多稔多黍

太簇為角

是尊是奉茲率舊章樂音純繹薦溢圓方情文備矣神
其迪嘗永觀錫羨多穡穰穰

姑洗為徵

穀資土養民賴穀生功利之博莫之與京式嚴祀壇因

物薦誠禮具樂奏惟神顧歆

南呂為羽

國主社稷時祀有常肅若舊典報本不忘粢盛豐潔歌
吟青黃尊神倏來百物賓將

盥洗用正安

祭重齊肅神格專精沃洗於阼涓潔著誠清明粢矣熙
事備成以似以續如坻如京

升壇用正安

神地之道粒食有先歲謹祈報禮嚴豆籩降登裸薦罔或不虔以似以續宜屢豐年

太社位奠玉幣用嘉安

春秋太社土正后稷通用

土發而祭農祥是祈籩豆加篚典禮有彛惟茲珪幣用告肅祗神靈降鑒錫我繁釐

太社位奠玉幣用嘉安

秋臘太社土正后稷通用

赫赫媼神稼穡是司方是藉斂報本攸宜嘉壇建祀玉帛陳儀明靈昭格以介蕃釐

還位用正安

國主太社地道聿神稷司百穀利毓惟均練日新吉粢
盛必芬神燕娛矣福此下民

捧俎用豐安

嘉承天和黍稷翼翼默相農功繄神之德俎實犧牲舊
章是式嗣有豐年我庾維億

太社位酌獻用嘉安

春社太稷土正后稷通用

封土崇祀有烈在民千載不昧福此人羣洗爵奠等有

酒其芬神具醉止愷樂欣欣

太社位酌獻用嘉安

秋稷臘太社土正后稷通用

叶氣嘉生年穀順成萬億及秭如坻如京奉時享牲告
於神明歌此良耜於昭德馨

亞終獻用文安

風雨時若自天降康稼穡滋殖自神發祥穀我婦子豐
年穰穰報本嚴祀齊明允臧

徹豆用娛安

報本之禮載于甲令靈壇昭告神既來聽徹彼豆籩精
誠斯罄實惟豐年農夫之慶

送神用寧安

乃粒烝民功昭萬古國有常祀薦獻式叙肅肅雍雍舊
章咸舉神保聿歸介我稷黍

望瘞用正安

地載萬物民資迺功報本稱祀太稷攸同禮樂既備訖
埋愈恭神其降嘏時和歲豐

宋祭風師樂章

案宋史樂志曰神宗熙寧祭風師迎神用欣安升降
用欽安奠幣用容安亞終獻用雍安送神用欣安凡
五章

迎神用欣安

飄飄而來淅瀝而下爰張其旂爰整其駕有豆有登有
兆有壇弭旌柅輶降止且安

升降用欽安

盥悅于下有盤有匱饋酌于上有登有彝服容柔止進
退優止即事寅恭神其休止

奠幣用容安

育我嘉生神惠是仰載致斯幣庶幾用享鼓之舞之式
緊爾神錫爾無疆佑此下民

亞終獻用雍安

栗栗壇坫載是豆觴醇烈氤氲晉薦芬芳酌之維宜獻
之維時民有報侑靈用安之

送神用欣安

奠獻紛紛靈心欣欣超然而返衆御如雲其施伊何多
黍多稌其祥伊何不愆厥叙

大觀祭風師樂章

案宋史樂志曰徽宗大觀祭風師降神用欣安初
獻升降用欽安奠幣用容安酌獻用雍安亞終獻
用雍安送神用欣安凡六章

降神用欣安

羽旗雲車飄颻自天猗歟南箕欣喜嘉升煙牲餼粢盛俎
簋鉶籩維神戾止從空冷然

初獻升降用欽安

明昭惟馨威儀孔時鏘鏘鳴佩欽薦牲犧惟恭惟祇無
愆無違周旋中禮肅恭委蛇

奠幣用容安

吹噓于喁披拂氤氲衆竅咸作潛運化鈞恩大功豐酬
神惟恭嘉贈盈箱于物有容

酌獻用雍安

犧尊斯陳清醑盈中芬芬苾苾馨香交通明靈來思歆
我精衷維千萬祀品物芃芃

亞終獻用雍安

清醑洋洋虔恭注茲條鬯敷宣神用歆之尊罍靜嘉金
奏諧熙於皇肆祀休我羣黎

送神用欣安

窈冥無窮肸蠭斯融來終嘉薦歸返遙空惟神之歸欣

安導和惟神之澤于彼滂沱

紹興祭風師樂章

案宋史樂志曰高宗紹興祭風師迎神用欣安初
獻升降盥洗用欽安奠幣用容安酌獻用雍安亞
終獻用欣安送神用欣安凡六章

迎神用欣安

夫物絪縕神氣撓之誰歟其司維南之箕俶哉明庶我
祀維時我心孔勞神其下來

初獻升降盥洗用欽安

神哉沛矣厥靈載揚揚靈如何剡剡皇皇我其承之繩
繩齊莊往從鬱人爰挾斯芳

奠幣用容安

物之流形甚畏瘡瘍八風平矣嘉生以遂絲縷之積有
量斯幣惟本之報匪物之貴

酌獻用雍安

我求於神無臭無聲神之燕享惟時專精大磬在列櫛

燎在庭侑我桂酒娛其以聽

亞終獻用欣安

禮有三祀儀物視帝神臨消搖疇敢跛倚重觴載申百
味孔旨神儀樂康答我以祉

送神用欣安

荃其止乎裊裊其容奄橫四海蹇莫之窮時不驟得禮
焉有終荃其行乎余心懍懍

宋祭雨師樂章

案宋史樂志曰徽宗大觀祭雨師迎神用欣安升降
用欽安奠幣用容安酌獻亞終獻用雍安送神用欣
安凡五章

迎神用欣安

神之無象亦可思索維雲陰陰維風莫莫降止壇宇來
顧芳馨侑以鼓歌薦此明誠

升降用欽安

珮玉璆如黼黻檐如承神不懈訖獲嘉虞聖皇命祀臣

敢弗恭凡爾在位翼翼雍雍

奠幣用容安

崇崇壇壝靈既降止有嚴執奠承祀茲始明靈在天式
顧庶察澤潤以時永拂荒札

酌獻亞終獻用雍安

寅恭我神惟上之使俾成康年民僖休祉折俎既登斟酌
酒既盈匪薦是專配以明誠

送神用欣安

牲俎告徹嘉樂休成卒事有嚴燕虞高靈蕃我民人育
我稷黍萬有千祀承神之祐

宋祭雨師雷神樂章

案宋史樂志曰高宗祭雨師雷神迎神用欣安初獻
盥洗升降用欽安奠幣用容安雨師位酌獻用雍安
雷神位酌獻用雍安亞終獻用欽安送神用欣安凡
七章

迎神用欣安

衆萬之託動之潤之昭格孔時維神之依洽然後先肆
我肯顧是耶非耶紛其來下

初獻盥洗升降用欽安

言言祠宮爰考我禮維西有壘維東有洗爰潔爰滌載
薦其醴神在何斯匪遠具邇

奠幣用容安

霈兮隱兮蹶其陰威相我有終胡寧不知我幣有陳我
邸斯珪豈惟有陳予以奠之

雨師位酌獻用雍安

山川出雲裔裔而縷載靈載濛其德迺溥自古有年胡然莫祖無簡我觴無怠我俎

雷神位酌獻用雍安

瞻彼南山有虺其出維蟄之奮維癘之息眷焉顧饗在夏之日觴豆匪報皇忍忘德

亞終獻用欽安

作解之德彤聲一兮爰展獻侑酌則三兮我興有假云

胡有私下土是冒庶其遠而

送神用欣安

陰旄載旋鼓車其鞭問神安歸冥然而天皇有正命祀
事孔蠲其臨其歸億萬斯年

宋享先農樂章

案宋史樂志曰太宗雍熙享先農降神用靜安奠玉
幣用敷安奉俎用豐安亞獻用正安終獻用正安送
神用靜安凡六章餘同祈穀

降神用靜安

先農播種九穀務滋靈壇致享良耜陳儀吉日惟亥運
屬純熙樂之作矣神其格思

奠玉幣用敷安

親耕展祀明靈來格九有駿奔百司庇職獻奠肅肅登
降翼翼祈彼豐穰福流萬國

奉俎用豐安

肅陳韶舞祇薦犧牲乃逆黃俎以率躬耕

亞獻用正安

祀惟古典食乃民天歆茲潔祀以應祈年

終獻用正安

式陳芳薦爰致虔誠神其降鑒永福黎甿

送神用靜安

明禋紺壇靈風肅然登歌已闋神馭將旋道光帝藉禮
備公田鑒茲躬稼永錫豐年

明道親享先農樂章

案宋史樂志曰仁宗明道親享先農迎神用靜安
皇帝升降用隆安奠玉幣用嘉安奉俎用豐安皇
帝初獻用禧安飲福用禧安退文舞進武舞用正
安亞獻用正安終獻用正安送神用靜安凡十章
迎神用靜安

稼政之本民食惟天甫田兆歲后稷其先靈壇既祀黛
耜攸虔乃聖能享億萬斯年

皇帝升降用隆安

冕服在御壇壝有儀陟降左右天惟顯思

奠玉幣用嘉安

將躬黛耜先陟靈壇嘉玉量幣樂舉禮殫神既至止福亦和安千斯積詠萬國多歡

奉俎用豐安

將迎景福乃薦嘉牲藉于千畝用此精誠

皇帝初獻用禧安

雲疊已實玉爵有舟薦于靈藉佇乃神休

飲福用禧安

神既至享福亦來酬
申錫純嘏旨酒維柔
思文后稷貽我來牟
子孫千億丕荷天休

退文舞進武舞用正安

羽葆有奕文武交相
周旋合度福祿無疆

亞獻用正安

豆籩雖薦黍稷非馨
惠我豐歲歆茲至誠

終獻用正安

歆我嘉薦錫我蕃禧多黍多稌如京如坻

送神用靜安

獻終豆徹禮備樂成祠容肅肅風馭冥冥三時務本一
墾躬耕人祇胥悅祉福是膺

景祐享先農樂章

案宋史樂志曰仁宗景祐享先農迎神用凝安升
降用同安奠幣用明安酌獻用成安送神用凝安

凡五章

迎神用凝安

在昔神農首茲播殖無有污萊盡為稼穡乃粒斯民實
惟帝力嘉薦令芳佇瞻來格

升降用同安

居德之厚厥祀攸陳土膏初脉農事先春鏗然金奏儼
若華紳陟降于阼福祿惟神

奠幣用明安

農為政本食乃民天苾芬明祀薦藁良田陳茲量幣望

彼豐年茂介福祉來欽吉蠲

酌獻用成安

農祥晨正平秩東作倬彼大田庥乃錢鎛酒醴盈尊金
瓊合樂期茲萬年充于六幕

送神用凝安

務穡之本恤祀惟馨神斯至止降福攸寧崇茲稼政合
于禮經俎徹樂闋邈仰迴靈

紹興享先農樂章

案宋史樂志曰高宗紹興享先農皇帝入內壝盥
洗用降安迎神用靜安神農后稷位奠幣用嘉安
尚書奉俎用豐安酌獻用禧安文舞退武舞進用
正安亞獻用正安終獻用正安飲福用禧安徹豆
用歆安送神用靜安凡十一章

皇帝入內壝盥洗用降安

大事在祀齊潔為先既盥而升奉以周旋下觀而化無
敢不蠲惟神降格鑒厥精虔

迎神用靜安

猗與田祖粒食之宗世世仰德青壇載崇時惟后稷躬稼同功作配並祀以詔無窮

神農后稷位奠幣用嘉安

制為量幣厚意是將求之以類各因其方予以奠之精誠允彰神其享止惠我無疆

尚書奉俎用豐安

柔毛剛鬣或剝或烹為俎孔碩登薦厥誠

酌獻用禧安

蠲滌醎筭巾悅而升挹彼注茲酒醴維清洋洋在上享
于克誠神其孚佑以厚民生

文舞退武舞進用正安

羽毛干戚張弛則殊進旅退旅匪棘匪舒

亞獻用正安

顯相祀事濟濟鏘鏘舉筭酌醴神其允臧

終獻用正安

般核維旅酒醴維馨于再于三禮則有成

飲福用禧安

幽明位異施報理同克恭明神降福乃豐我膺受之來
燕來崇豈伊專享于彼三農

徹豆用歆安

莫重于祭非禮不成籩豆有踐爾般既馨神具醉止薦
以齊明贊徹孔時釐事斯成

送神用靜安

神之來止風駛雲翔神之旋歸有迎有將歌以送之磬
筦鏘鏘何以惠民豐年穰穰

紹興祀先農攝事樂章

案宋史樂志曰高宗紹興祀先農攝事迎神用凝
安初獻升殿用同安盥洗同奠幣用明安神農位
酌獻用成安后稷位酌獻用成安亞終獻用同安
送神用凝安凡七章

迎神用凝安

青陽開動土膏脈起日練吉亥為農祈祉典秩增峻儀
物具美幄光煥黃庶幾戾止

初獻升殿用同安

率職咸涖禮容睟然澡身端意陟降靡愆神心嘉虞享
茲潔蠲敷錫純佑屢登豐年

奠幣用明安

靈存載臨見光陳贄有嚴篚實式將純意肸鬯既接禮
行有次神兮安留歆我裡祀

神農位酌獻用成安

耒耜之教帝實開先致養垂利古今民天嘉薦報本于
以祈年誠格和應神娛福延

后稷位酌獻用成安

有周應歷實起后稷相時神功率由稼穡振古稱祀先
農並食阜我昌我時萬時億

亞終獻用同安

旨具百味酌備三疇貳觴既畢禮洽意周庶幾嘉享格

神之幽相我穡事錫以有秋

送神用凝安

熙事成兮始終潔齊籩豆徹兮擗節靡垂靈有嘉兮降
福孔皆飄然逝兮我心孔懷

宋享先蠶樂章

案宋史樂志曰仁宗景祐享先蠶迎神用明安升降
用翊安奠幣用娛安酌獻用美安亞終獻用惠安送
神用祥安凡六章

迎神用明安

生民之朔衣皮而羣惟聖有作被冒以文禮樂以成貴
賤以分欲報之德金石諧均

升降用翊安

掩抑笙簫鏗鎔金石神來娛娛嘉我休德奉祀之臣洗
心翊翊錫茲福禧以惠四國

奠幣用娛安

皇天降物屢化若神聖實先識躬以教民功被天下為

萬世文幣以達志庶幾徹聞

酌獻用美安

賁哉聖神功成微妙迺袞迺裳以供郊廟百末旨酒嘉觴自昭靈徠燕饗不嘖以笑

亞終獻用惠安

神之徠駕蹌蹌紫壇熙燭夜光會竽瑟鳴球琅薦旨酒雜蘭芳佑明德錫百祥

送神用祥安

神之功兮四海所宗占五帝兮莫與比崇條往來兮旌
旗容容恭明祀兮萬世無窮

紹興祀先蠶樂章

案宋史樂志曰高宗紹興祀先蠶迎神用明安初
獻盥洗升殿用翊安降同奠幣用娛安酌獻用美
安亞終獻用惠安送神用祥安凡六章

迎神用明安

功被寰宇僣蟲之靈有神司之以生以成典禮有初祀

事講明孔蓋翠旌降集于庭

初獻盥洗升殿用翊安

靈修戾止詔以毛血既盥而悅尊爵蠲潔金石諧宛登
降有節宜顧宜享情文不越

奠幣用娛安

化日初長時當暮春蠶事方興惟后惟嬪絲纈御冬殘
生濟人敢忘報本篚幣是陳

酌獻用美安

盛服承祀出自公桑衣不羽皮利及萬方百末旨酒有
飮其香神其歆止洋洋在傍

亞終獻用惠安

日吉良辰禮備樂作精誠內孚俎豆交錯升歌清越侑
此三爵黎民不寒幽顯同樂

送神用祥安

神之來矣靈風肅然云胡不留歸旒有翩乃舉舊典歲
以告虔降福我邦於萬斯年

宋親耕耤田樂章

案宋史樂志曰高宗紹興親耕耤田皇帝出大次用
乾安親耕升壇公卿耕耤羣官耕耤降壇歸大次俱
用乾安凡七章

皇帝出大次用乾安

勤勞稼穡必躬必親為耤千畝以教導民帝出乎震時
維上春天顏咫尺望之如雲

親耕用乾安

元辰既擇禮備樂成洪縻在手祇飾專精三推一墜端冕朱紘靡辭染屨以示黎甿

升壇用乾安

方壇屹立陞級而登玉色下照臨觀耦耕萬目咸覩如日之升成規成矩百祿是膺

公卿耕藉用乾安

羣公顯相奉事齋莊率時農夫舉耜載揚播厥百穀以佑我皇多黍多稌不應農祥

羣官耕耤用乾安

畋畋良耜我田既臧土膏其動春日載陽執事有恪于此中邦農夫之慶棲畝餘糧

降壇用乾安

肇新帝耜率我農人三推終畝祇事咸均陟降孔時粲然有文受天之祐多稼如雲

歸大次用乾安

教民稼穡不令而行進退有度琚瑀鏘鳴言還煩幄禮

則告成帝命率育明德惟馨

宋蜡祭百神樂章

案宋史樂志曰真宗景德蜡祭百神降神用高安奠
玉幣酌獻用嘉安送神用高安凡三章

降神用高安

百神蕃阜四方順成通其八蜡合乃嘉平旨酒斯醇大
庖孔盈萬靈來格威儀以成

奠玉幣酌獻用嘉安

肅肅靈壇昭昭上天潔粢豐盛以享以虔百神咸萃六
樂斯縣介茲景福期于百年

送神用高安

來顧來享禮成樂備靈馭翩翩雲行雨施

熙寧蜡祭樂章

案宋史樂志曰神宗熙寧蜡祭東西郊降神用熙
安升降用肅安奠幣用欽安奉俎用承安酌獻用
懌安亞終獻用慶安送神用宣安南北方迎神用

簡安升降用穆安奠幣用吉安酌獻用禋安亞終
獻用曼安送神用成安凡十三章

降神用熙安

天錫康年四方順成乃通蜡祭索享于明金石四作羽
旄翠旌神來燕娛澤被蒼生

升降用肅安

惟蜡有祭報神之功合聚萬物來享來宗承詔攝事不
忘肅雍靈之格思福祿來崇

奠幣用欽安

穰穰豐年繫侯休德帥承天和欽象古則嘉玉量幣奠
容翼翼靈施暨民罔有終極

奉俎用承安

禮崇明祀必先成民奉牲以告備膾其均炮炙芬芬俎
豆莘莘錫之純嘏以佑斯人

酌獻用懌安

秩秩禮文為壇四方嘉粟旨酒百神迪嘗敷與萬物既

阜既昌伊樂厥福傳世無疆

亞終獻用慶安

禮文備矣肅肅無譁金石諧節圭璧光華采以告豐禮
以告嘉錫茲福祉以澤幽遐

送神用宣安

靈之來下擴景乘光靈之迴御景龍以驤鑒我休德降
嘏產祥大田多稼以惠無疆

南北方迎神用簡安

美若休德民和歲豐稼穡雲施其積如墉惠我四國先
嗇之功祭之百種來享來宗

升降用穆安

皇皇靈德經緯萬方承詔攝事陟降以莊高冠岌岌長
佩鏘洋嘉承神貺令聞不忘

奠幣用吉安

於穆明祀莫如報功靈之利澤惠我無窮齋以滌志幣
以達衷撫寧四極永錫登豐

酌獻用禋安

英英禮文既備而全嚴嚴四郊屹屹紫壇百末旨酒其馨若蘭何以畀民既壽而安

亞終獻用曼安

林林生民含哺而嬉教之稼穡實神之為圖報厚德萬祀無期以假以享錫我繁禧

送神用成安

嘉薦芳美靈來燕娛旂車結雲若風馬馳既至而喜錫

我蕃禧嘉承天貺曼壽無期

大觀蜡祭樂章

案宋史樂志曰徽宗大觀蜡祭東郊亞終獻用慶
安南郊升降用穆安凡二章

東郊亞終獻用慶安

震乘春陽仁司生殖錫我歲豐襄我民力誰其尸之宗
子先嗇億萬斯年懷神罔極

南郊升降用穆安

穆如熏風敷舒文藻氣蒸消除豐子黍稻神之聽之鐘鼓咸考於萬斯年惟皇之報

紹興以後蜡祭樂章

案宋史樂志曰高宗紹興以後蜡祭東方百神降神用熙安初獻升降用肅安大明位奠玉幣用欽安帝神農氏位奠幣用欽安后稷氏位奠幣用欽安奉俎用承安大明位酌獻用擇安神農位酌獻用擇安后稷位酌獻用擇安亞終獻用慶安送神

用宣安西方百神降神用熙安初獻升降用肅安
夜明位奠玉幣用欽安神農位奠幣用欽安后稷
位奠幣用欽安奉俎用承安夜明位酌獻用擇安
神農位酌獻用擇安后稷位酌獻用擇安亞終獻
用慶安送神用宣安南方百神迎神用簡安初獻
盥洗升降用穆安奠幣用吉安神農位酌獻用穆
安后稷位酌獻用穆安亞終獻用曼安送神用成
安北方百神迎神用簡安初獻盥洗升降用穆安

奠幣用吉安配位同神農位酌獻用禋安后稷位
酌獻用禋安亞終獻用曼安送神用成安凡四十
二章

東方百神降神用熙安

圜鐘為宮

玄冥凌厲歲聿其周天地閉藏農且息休古為蜡禮伊
耆肇修爰薦飮馨以迓颶殄

黃鐘為角

惟大明尊實首三辰功赫庶物光被廣輪歲方索享咸
秩羣神靈存來下尸此明裡

太族為徵

三時不害四方順成酬功報始以我齊明幽頌土鼓樂
此嘉平降祥幅員惠于函生

姑洗為羽

日昱乎晝容光必照肸蠁之交惟人所召有監在下視
茲升燎肅若其承雲駢星曜

初獻升降用肅安

禮儀告具必儼容莊工歌屢奏聲和義章宗壇陟降濟
濟蹒蹒靈光共仰嘉薦芬芳

大明位奠玉幣用欽安

晨曦未融天宇澄穆有虔秉誠將以幣玉如在左右罔
不祗肅神兮安留錫以祉福

帝神農氏位奠幣用欽安

農為政本食乃民天神農氏作民始力田先嗇之配禮

報則然有幣將之維以告虔

后稷氏位奠幣用欽安

播種之功時惟后稷推以配天莫匪爾極崇侑清祀是
為司嗇陳幣奠將永祚王國

奉俎用承安

享以精禋馨非稷黍工祝致告孔碩為俎執事駿奔繩
繩具舉神之嘉虞介福是與

大明位酌獻用擇安

肇禋備祀教民美報時和歲豐奉醴以告惟照臨功等
于載燾酌獻云初明神所勞

神農位酌獻用擇安

惟酒欣欣惟神冥冥是顧是享來燕來寧耒耜之利神
所肇興萬世永賴無斁其承

后稷位酌獻用擇安

釋之蒸之為酒為醴推本所由於焉洽禮周邦開基邵
家是啟獻茲嘉觴拜下首稽

亞終獻用慶安

申以貳觴百末且旨禮告三終神具醉止旌容騎沓揚
光紛委降福穰穰被大豐美

送神用宣安

禮樂既成神保聿歸言歸何所地紀天維豈惟屢豐嗣
歲所祈億萬斯年神來燕娛

西方百神降神用熙安

圜鐘為宮

玄冬肇祀始於伊耆歲事聿成庸答蕃釐眷言西顧匪
神司之歸功爾神翩其下來

黃鐘為角

魄生自西照望太陽下暨諸神貺施萬方節適風雨富
我囷箱恭承嘉祀惟以迪嘗

太簇為徵

神罔小大奠方茲土祭列坊墉禮迨貓虎有功斯民祀
乃共所非稷馨香厥福周溥

姑洗為羽

豐年穰穰美芳職職籩豆方圓其儀孔碩風馬在御雲
車載飭來顧來享惟娛休德

初獻升降用肅安

盥獻恭莊燎煙芬酷載陟載降禮容可度欽惟爾神上
下肅肅成我稷黍鑒此牲玉

夜明位奠玉幣用欽安

穆穆太陰禮嚴姊事璧玉華光推以袞對十二周天歲

乃有終盡我備物莫報元功

神農位奠幣用欽安

耒耜肇興自神農氏稼穡滋殖為農者始作配明祀奠
以告虔萬世佃漁帝功卓然

后稷位奠幣用欽安

明明周祖惟民之恤播種為教下民迺粒曾是索享而
匪先公萬物難報阡陌之功

奉俎用承安

時和歲登物忘疾癘實俎間膏報神之福匪神福之曷
成且豐肥膾咸有惟神之功

夜明位酌獻用擇安

除壇西郊坎其擊鼓百靈至止結璘作主秬鬯湛淡玉
斚觶醪是謂嘉德神其安留

神農位酌獻用擇安

蕩蕩鴻明稱秩羣祀配以昔帝式重農事潔我圭瓚黃
流在中靈其鑒茲肸鬯豐融

后稷位酌獻用擇安

歲十二月祀有常典登列司嗇言反其本酌彼泰尊百
末蘭生承神嘉虞繫此德馨

亞終獻用慶安

歌磬臚騶背蕭激香颺御奄留申以貳觴相與震澹告
靈其醉庶幾聽之成我熙事

送神用宣安

禮備樂成澹然將歸其留消搖象輿已軼偃蹇欲驤羽

毛紛委忽杳冥遺此福祉

南方百神迎神用簡安

維物之精散乎太空維索之享合聚而同迺擊土鼓于
歲之終格彼幽矣盱蠻其通

初獻盥洗升降用穆安

有睨其新有匪其潔言念清祀弗簡弗褻誠意既交品
物斯列是用告虔靡神不說

奠幣用吉安

百室機杼衣褐具宜民以卒歲神實惠之言舉祀典答神之釐有筐斯陳振古如茲

神農位酌獻用穆安

肇降生民有不粒食維時神農迺為先嗇爾耒爾耜云誰之因酌以污尊我思古人

后稷位酌獻用穆安

維后之功配天其大祀而稷之萬世如在黃冠野服駿奔皇皇自古有年神其降康

亞終獻用曼安

豐年孔多百禮以洽匪極神歡何以昭答載酌之酒用
申其勤神具醉止與物交欣

送神用成安

卒爵樂闋禮儀告備神保聿歸敢以辭致順成之方其
蜡乃通自今伊始八方攸同

北方百神迎神用簡安

蕩蕩閭決氣清沈寥彷彿象輿麗于穹霄蹇其來下肅

然風飄神乎安留於焉消搖

初獻盥洗升降用穆安

齊誠揭虔敬恭祀事維儼之容維潔之器雍雍樂成肅肅禮備神其燕娛錫祉庶類

奠幣用吉安

神宅于幽眈眈沉沉至和塞明考我德音神聽靜嘉儼乎若臨幣以薦誠敢有弗欽

神農位酌獻用禋安

先嗇之功神實稱首以耜以耒俶載南畝列籍皇墳億
世是守何以為報爰潔茲酒

后稷位酌獻用禋安

煌煌后稷實配于天司穡作稼民以有年匪神之私歲
以醴告酌彼泰尊于德之報

亞終獻用曼安

蘭生百末申以貳觴神具醉止爛其容光遺我豐年萬
億及秭俾民驩康以洽百禮

送神用成安

靈之來兮蚪龍沓沓下土光景憑陵閭闔靈之旋兮羽
衛委蛇偃蹇高驤遺此蕃釐

宋祭文宣王廟樂章

案宋史樂志曰仁宗景祐祭文宣王廟迎神用凝安
之曲初獻升降用同安之曲奠幣用明安之曲酌獻
用成安之曲飲福用綏安之曲充國公配位酌獻用
成安之曲哲宗朝增送神用凝安之曲凡七章案釋

奠樂章肇始於唐藝祖受命詔竇儼撰十二安然皆
奏于郊廟初不及文宣王意爾時百度草創孔廟祭
享猶仍唐舊至景祐朝始撰定樂章云

迎神用凝安

大哉至聖文教之宗紀綱王化丕變民風常祀有秩備
物有容神其格思是仰是崇

初獻升降用同安

右文興化憲古師今明祀有典吉日惟丁豐犧在俎雅

奏來庭周旋陟降福祉是膺

奠幣用明安

一王垂法千古作程有儀可仰無德而名齊以滌志幣
以達誠禮容合度黍稷非馨

酌獻用成安

自天生聖垂範百王恪恭明祀陟降上庠酌彼醇旨薦
此令芳三獻成禮率由舊章

飲福用綏安

犧象在前豆籩在列以享以薦既芬既潔禮成樂備人
和神悅祭則受福率遵無越

充國公配位酌獻用成安

無疆之祀酌侑可宗事舉以類與享其從嘉栗旨酒登
薦惟恭降此遐福令儀肅雍

送神用凝安

肅肅庠序祀事惟明大哉宣父將聖多能歆馨肸鬯迴
馭陵競祭容斯畢百福是膺

釋奠樂章

案宋史樂志曰徽宗大觀三年釋奠迎神用凝安之曲升降用同安之曲奠幣用明安之曲酌獻用成安之曲配位酌獻用成安之曲送神用凝安之曲凡六章外大晟府擬撰者不復採入盖云擬撰則未經承祀所用耳

迎神用凝安

仰之彌高鑽之彌堅於昭斯文被于萬年
峩峩膠庠神

其來止思報無窮敢忘于始

升降用同安

生民以來道莫與京溫良恭儉惟神惟明我潔尊罍陳
茲芹藻言升言旋式崇斯教

奠幣用明安

於論鼓鐘于茲西雍粢盛肥碩有顯其容其容洋洋咸
瞻像設幣以達誠歆我明潔

酌獻用成安

道德淵源斯文之宗功名糠粃素王之風碩兮斯牲芬
兮斯酒綏我無疆與天為久

配位酌獻用成安

儼然冠纓崇然廟庭百王承祀涓辰惟丁于牲于醑其
從予享與聖為徒其德不爽

送神用凝安

肅莊紳綏吉蠲牲犧於皇明祀薦登惟時神之來兮盱
蠭之隨神之去兮休嘉之貽

宋釋奠武成王樂章

案宋史樂志曰仁宗景祐釋奠武成王迎神用凝安之曲太尉升降用同安之曲奠幣用明安之曲酌獻用成安之曲飲福用綏安之曲送神用凝安之曲凡六章宋沿唐舊故有專祀後此遂廢

迎神用凝安

維師尚父賜履分封靈神峻密祀事寅恭蕭鄉祗薦颺馭排空如幾如式福祿來崇

太尉升降用同安

上公攝事衮服斯皇禮容濟濟佩響鏘鏘靈旂恍惚嘉
薦令芳神具醉止降福穰穰

奠幣用明安

四嶽之裔涼彼武王發揚蹈厲周室用昌追封廟食簡
冊增芳升幣以奠磬筦鏘鏘

酌獻用成安

獵渭之陽理寔嘉應非龍非虎聿求元聖平易近民五

月報政祀典之崇於斯為盛

飲福用綏安

神機經武降周之寓表海分封邁燕超魯耽耽廟貌俎
豆有序薦福邦家維師尚父

送神用凝安

聖朝稽古崇茲武經禮交樂舉于神之庭嘉粟旨酒既
饗芳馨永嚴列象劍烏簪纓

熙寧祀武成王樂章

案宋史樂志曰神宗熙寧祀武成王初獻升降用
同安之曲凡一章

初獻升降用同安

武德洸洸日靖四方百王所祀休有列光命官攝事佩
玉鏘鏘思皇多祐以惠無疆

大觀祀武成王樂章

案宋史樂志曰徽宗大觀祀武成王酌獻用成安
之曲凡一章

酌獻用成安

涼彼周王君臣相遇終謀其成諸侯來許洋洋神靈尊
載酒醑新聲為侑笙簫備舉

紹興釋奠武成王樂章

案宋史樂志曰高宗紹興釋奠武成王迎神用凝
安之曲初獻升殿用同安之曲奠幣用明安之曲
正位酌獻用成安之曲留侯位酌獻用成安之曲
亞終獻用正安之曲送神用凝安之曲凡七章

迎神用疑安

姑洗為宮

於赫烈武光昭古今載嚴祀事敕備惟欽既潔其牲既
諧其音神之格思來顧來歆

初獻升殿用同安

肅肅廟中有嚴階城匪棘匪徐進退可則冕服是儀環
珮有節神之鑒觀率履不越

奠幣用明安

祀率舊典禮崇駿功齊明衷正肸蠁豐融量幣肅備周
旋鞠躬神其昭受幽贊無窮

正位酌獻用成安

赫赫尚父時維鷹揚神潛韜略襟抱帝王談笑致主竹
帛流芳國有嚴祀載稽典故

留侯位酌獻用成安

眷彼留侯奇籌贊漢依乘風雲勒成功旦克配明禋儀
刑有煥英氣如生來格來衍

亞終獻用正安

道助文德言為世師功名不泯祀事無違旨酒惟馨具
醉在茲有嘉累獻神其燕娛

送神用疑安

日惟上戊神顧精純禮備三獻樂成七均奄留洋洋流
福無垠言還恍惚空想如存

宋祀祚德廟樂章

案宋史樂志曰高宗紹興祀祚德廟迎神用疑安之

曲初獻升降用同安之曲奠幣用明安之曲疆濟公
位酌獻用成安之曲英略公位酌獻用成安之曲啟
佑公位酌獻用成安之曲亞終獻用正安之曲送神
用凝安之曲凡八章祚德廟惟宋垂諸祀典猶如唐
之玄元廟興聖廟耳

迎神用凝安

姑洗為宮

匿孤立後惟義惟忠昔者神考追錄乃功祀典載加進

爵錫公神兮降格尚鑒褒崇

初獻升降用同安

廟宇更新輪奐豐敞神靈如在英姿颯爽執事進趨升降俯仰威儀翼翼虔祈歆饗

奠幣用明安

牲薦碩大幣致精純聿升祀事茲用魚陳箱篚既實奠獻惟寅饗我至意福祿來成

疆濟公位酌獻用成安

以身託孤實惟死友撫嫗長之若父若母潛授于韓克
興厥後崇廟以獻德多報厚

英略公位酌獻用成安

立孤固難死亦匪易義輕一身開先趙嗣肅穆廟貌烈
有餘氣式旋嘉薦昭哉祀事

啟佑公位酌獻用成安

於皇時宋永祚有基始繫覆護扶而立之敢忘昭答牲
分酒醴靈其燕饗益相本支


亞終獻用正安

呦呦靈宇神安且翔三哲鼎峙中薦嘉觴凜若義氣千
載彌光猗其祐之錫羨無疆

送神用凝安

樂云備畢觴爾神翊翊音送輶輿若聞駕言歸兮靈
旂結雲祚我十億介福來臻

御製律呂正義後編卷一百



總校官庶吉士臣張能照

校對官檢討臣王坦修

謄錄監生臣張承恩